

15 DEC 1997

Sidang-Ucapjasa

PENANDATANGAN PENGASAS ASEAN DIANUGERAHKAN UCAPJASA

KUALA LUMPUR, 15 Dis (Bernama) -- Asean meraikan sidang kemuncak memperingati ulangtahunnya yang ke-30 di sini dengan memberi penghormatan kepada lima penandatanganan Deklarasi Bangkok 1967 yang membawa kepada kelahiran pertubuhan Asia Tenggara itu.

Bagaimanapun hanya bekas menteri luar Thai Tun Thanat Khoman yang hadir untuk menerima anugerah ulung "Asean Heads of Government Citation" (Ucapjasa Ketua-ketua Kerajaan Asean) itu pada satu jamuan malam yang diraikan Perdana Menteri Datuk Seri Dr Mahathir Mohamad, pengerusi sidang kemuncak itu, di hotel Palace of the Golden Horses di sini malam ini.

Seorang lagi penerima lain yang masih hidup bekas menteri luar Singapura S. Rajaratnam diwakili oleh Menteri Luar negara itu Prof S. Jayakumar sementara Allahyarham Tun Razak Hussein, Tun Adam Malik dan mendiang Narciso Ramos diwakili balu masing-masing Tun Rahah Tan Sri Noah, Puan Nelly Adam Malik dan senator Leticia Ramos Shahani.

Abdul Razak ketika menandatangani deklarasi itu merupakan Menteri Pertahanan dan Pembangunan Negara, Adam ialah Menteri Luar Indonesia dan Narciso merupakan Setiausaha Luar Filipina.

Anugerah itu merupakan pengiktirafan tertinggi yang diberikan Asean dan pertubuhan itu setiap dekad memberikan anugerah pengiktirafan kepada sejumlah individu.

Mereka masing-masing menerima satu medalion emas dan skrol mencatatkan ucapajasa yang ditandatangani oleh kesemua sembilan ketua-ketua kerajaan Asean.

Para pemimpin yang menghadiri majlis jamuan malam ini ialah Sultan Brunei Hassanal Bolkiah, Perdana Menteri Laos Khamtay Siphandone, Pengerusi Majlis Ketenteraman dan Pembangunan Myanmar Than Shwe, Presiden Filipina Fidel Ramos, Perdana Menteri Singapura Goh Chok Tong, Perdana Menteri Thai Chuan Leekpai dan Perdana Menteri Vietnam Phan Vam Khai.

Menteri Luar Indonesia Ali Alatas mewakili Presiden Suharto, yang membatalkan kunjungannya ke sini atas nasihat doktor.

Yang turut hadir ialah Setiausaha Agung Pertubuhan Bangsa-bangsa Bersatu Kofi Annan, yang berada di Malaysia untuk lawatan rasmi empat hari.

-- BERNAMA

RA RON